

## Mando Via Mayoria?

Demokrasia ta indiskutibelmente e mihó sistema di gobèrnashon. Asina nos ta asumí i afirmá sin pensa dos òf tres bes. Ma esei ta bèrdat?

E pilar prinsipal riba kua demokrasia ta basá ta elekshon, i elekshon ta basá riba e konsepto ku loke mayoria ta deseá ta e direkshon korekto pa kana. Ma ta bèrdat ku loke 51 (òf mas) porshento ta selektá ta e mihó ruta? Mayoria semper ta skohe loke Dios perfekto ta deseá? Bos di puebel ta bos di Dios?

Historia ta proba bes tras bes ku preferensia di mayoria NO ta semper korekto. Dia 8 di novèmber 1923, e nazinan pa un solo voto a eligí Adolf Hitler komo nan líder. Mayoria tabatin rason? Kon diferente historia di Alemania, Oropa, i mundu lo tabata si mayoria no a selektá e burdugu ei!

Hopi otro ehèmpel por ser duná. Mayoria a hasi chèche ora Kristobal Kolon a deklará ku mundu ta rondó. Mayoria den siertu sektor a rechasá Galileo su kreensia ku mundu ta drai rònt di solo. Mayoria un tempu a favoresé esklabitut. Mayoria a duda ku hende por traha un mashin ku ta bula. Mayoria a duda ku vakuna por prevení bruera loko ("pokken"). Mayoria di e multitut a favoresé pa krusifiká Hesus (e kibokashon mas grandi di historia). Beibel tambe ta bisa ku mayoria ta riba e kamina robes: "e kamina ku ta hiba na pèrdishon ta spasio, tin hopi ku ta bai p'è;...e kamina ku ta hiba na bida ta smal, i poko ta esnan ku ta hañ'é" (Mateo 7:13-14). Nò, mayoria no tin semper rason. Si bos di puebel ta semper bos di Dios, anto Dios ta kulpabel di kometé algun eror grandi

E "mentalidat di mayoria" ta produsí un otro postema. Polítikonan ta tentá (ku elekshon en bista) pa hasi loke ta popular--loke lo produsí mas voto—enbes di loke ta korekto, hustu, i bon. Ta un sekretu públiko ku bastante polítiko ta kai den e trampa aki, maske tur ke duna un impreshon kontrario.

Hesus a kondená esnan ku ta "risibí onor un di otro, i no ta buska onor ku ta bin dje úniko Dios" (Juan 5:44). Si polítikonan (i suidadanonan) tin komo prioridat pa ta aseptábel pa Dios, enbes di ta popular serka hende, nan lo evitá tur sorto di trampa. William Penn, un mandatario di 300 aña pasá a bisa, "Bon ta bon, asta ora tur hende ta opon'é, i malu ta malu, asta ora tur hende ta favores'é." Gobèrnantenan ku tin e wesu di lomba pa hasi loke ta bon (agradá Dios) apesar di opinion di mayoria, ta e tipo di mandatario ku nos tin mester.

Si demokrasia no ta optimal, kua sistema di gobèrnashon ta mihó? Sin duda esei ta diktadura! Un pèrsona ta imponé leinan ku ta hustu, medidanan ku ta efektivu, konstrukshonnan ku ta nesesario, hustisia ku ta imparzial, evitando tur e burokrasia ku hopi bes ta indeseá, infleksibel, i di durashon infinito.

Ma e palabra "diktadó" hustamente ta produsí un imagen mental di un mandatario ku ta abusá kruelmente di su poder, buskando solamente su propio interes. E nòmbernan Adolf Hitler, Hosé Stalin, Idi Amin, Nicolae Ceausescu, Saddam Hussain, Francois Duvalier, èts. ta papia ku elokuensia pa nan mes. E sistema diktatorial ta e mihó sistema SOLAMENTE si e mandatario ta un diktadó BONDADOSO. E MESTER ta un pèrsona ku ta hustu, ku ta stima su puebel.

No spanta; nos no ta boga pa un diktadura na nos islanan. Ningun ser humano ta konfiabel ku poder apsoluto. E dicho famoso ta bèrdat: "Poder ta kontaminá; poder total ta kontaminá totalmente."

Ma tin un eksepsion. Tempu ta bin ku Hesu-Kristu lo reina riba mundu pa mil aña (Revelashon 20:1-6). Su reino lo no ta un demokrasia; lo no tin elekshon òf referèndum pa saka afó kiku mayoria ta deseá. Su reino lo ta un monarkia apsoluto. E lo ta un diktadó bondadoso, perfektamente hustu, imparzial, no buskando Su propio interes, hasiendo loke ta korekto i bon. "E gobèrná komo Rei pa tur eternidat" (Revelashon 11:15).

Nos mester yama Dios danki ku maske demokrasia tin su defektonan, tòg nos por gos'é na nos islanan. Ma nos no mester pèrdè bista di e echu ku Dios ta e Mandatario soberano. No tin mando via mayoria serka dj'E. Komo tal, tantu gobèrnantenan komo suidadanonan mester rekonosé ku nos pais i nos bidanan MESTER ta dirigí awor i den futuro conforme ku Su mandamentunan hustu hañá den Beibel, Su Palabra santu.